

UniKL perlu teruskan ‘bernafsu’, momentum kemenangan

Kuala Lumpur: Juara Liga Hoki Malaysia (MHL) 2020, Universiti Kuala Lumpur (UniKL) tidak seharusnya terbuai-buai dengan rekod bersih dalam saingan kejuaraan itu, sebaliknya perlu melipatgandakan usaha apabila turun beraksi pada peringkat separuh akhir Piala TNB 2020.

Presiden UniKL, Datuk Dr Mazliham Mohd Su'ud berkata, pasukan UniKL yang juga juara bertahan MHL musim lalu, sudah menampilkkan prestasi cemerlang dalam saingan musim ini, dan momentum kemenangan itu perlu diteruskan dalam kempen Piala TNB, bermula hari ini.

“Mereka perlu ada kemahuan untuk menang jika mahu terus mencipta kejayaan. Sebagai pasukan terbaik tanah air pada masa kini, UniKL perlu buktikan dengan meraih gelaran juara Piala TNB tahun ini,” katanya pada majlis penghargaan kepada pasukan hoki UniKL, semalam.

UniKL yang turut merangkul gelaran Piala Sumbangsih 2020 bulan lalu, bakal berdepan pasukan Maybank pada saingan separuh akhir Piala TNB, hari ini.

Aksi Piala TNB akan berlangsung di Stadium Hoki Nasional Bukit Jalil.

Empat pasukan terbaik dalam saingan MHL 2020 layak bersaing dalam aksi separuh akhir Piala TNB 2020. Selain UniKL dan Maybank, dua lagi pasukan bakal berentap pada Piala TNB adalah Pasukan Hoki Terengganu (THT) dan Tenaga Nasional Berhad (TNB).

Mazliham seterusnya mengingatkan pasukan UniKL supaya tidak mengambil mudah saingan Piala TNB, seperti ketika mereka menentang TNB dalam kempen terakhir MHL, Ahad lalu.

Dalam pada itu, beliau memuji barisan pemain UniKL musim ini yang dianggap ‘lebih bertenaga’ berbanding musim lalu.

UniKL yang dibimbing Arul Selvaraj, menamatkan saingan MHL musim ini dengan rekod cemerlang 14 perlawanan tanpa kalah selepas seri 1-1 menentang TNB, minggu lalu.

Arul berkata, walaupun anak didiknya mempamerkan aksi cemerlang dalam saingan MHL, banyak perkara perlu diperbaiki dalam misi mereka meraih gelaran juara Piala TNB 2020.

BERNAMA